

## Kapiya Sën Paulus Kevu Vu Pilemon

<sup>1</sup> Sa Paulus, sa nado karabus rak sën sa nanër Kerisi Yesu yi gagek rangah. Alu hil arid Timoti kevu kapiya sënë yök vu hong Pilemon sën alu ahëmin neving hong balöö nehevong Anutu yi huk lok ti lo. <sup>2</sup> Alu kevu kapiya sënë vu melu he avëhnömin Apiya, gevu Arkipus sën tu Anutu yi mehö-begö-yi ving hil lo. Log alu kevu vu Yesu-yi-alam sën yam denesupin sir lok hong beggang lo pin ving. <sup>3</sup> Hil Amad Anutu luho Mehöböp Yesu Kerisi degevong hir semusemu nyëmasën nökö vu ham beham ayomin gëp revuh.

### *Pilemon Ahë Neving Mehöböp*

<sup>4</sup> Sa kwag nevo hong mesa najom rak in hong vu sa Anutu yoh vu buk pin nebë sahëg nivesa vu yi in hong. <sup>5</sup> In sa nehango galam denenër bë ahëm neving Mehöböp Yesu, bayom neya timu vu yi rot, log ahëm neving Anutu-yi-alam pin ving. <sup>6</sup> Log sa najom rak bë hil medo jevuh ti, in hil nehevong ving ggëp ti. Lob sënë rëk gevong begejak ngaa nivesa vesa pin sën tu hil ngaa in Kerisi-yi-alam hil lo ni. <sup>7</sup> Arig-e, yönon! Ahëm neving Anutu-yi-alam megenelok vu sir lob ayoj sepëp rak. Gesaga vo niwëek vu sa ving besa kwag vesa rot.

### *Pilemon Gekö Onesimus Nom Nabë Ari*

<sup>8</sup> Log sa bë ketag ngaa ti vu hong. Kerisi yi mehö sa, om seyoh vu bë nanër los niwëek vu hong nabë gwevong nabë sënë. <sup>9</sup> Rëk mu su rëk nabë saga rë,

gak sək nahub ketag vu hong in alu ahəd neving hil. Yönon, sa Paulus sən sa neketag vu hong lo! Sa atov rak, gesa nado loḵ karabus rak sən sa nanər Yesu Kerisi yi gägek rangah lo. <sup>10</sup> Sa ketag vu hong nabë: Gwelë sa nalug Onesimus nivesa. In sən sa nado karabus lo, lob sehërin yi yom vu Kerisi benebë sən tu sa nalug. <sup>11</sup> Wirekek su nevong huk nivesa meneloḵ vu hong rë, gak gwëbeng sënë og rëḵ gevong huk nivesa bedoḵ vu hong gesa geving.

<sup>12</sup> Lob sa nehevong yi yök vu hong ggök yahin, rëḵ mu sagi vong bë sa vepul sa navig len ti vër behevong yök vu hong. <sup>13</sup> Yönon, sa nado loḵ karabus rak sən sa nanər Bengö Nivesa rangah, lob sa nehevongin bë gulin yi bemedo geving sa in doḵ nah böm bemedo gëgin sa nivesa. <sup>14</sup> Rëḵ ma gesa su rëḵ gevong jëggin rë, in su genedo in bë gengogekin rë. Gak mëm nabë ngo gemedo bekvam bo nabë gwëvong nivesa vu sa, og mëm. <sup>15</sup> Onesimus tah yi vër in hong dus teka, om maḵ ngaa saga verup in bë mëm rëḵ gwëko yi nah gökin bemedo degwata geving hong. <sup>16</sup> Om gwëko yi nöḵ vu hong, rëḵ mu su gwelë yi nabë hur sən tu ngaa meris mu. Gak sagak maya gegwëbeng og tu arim ti, om ahëm geving yi. Yönon, sahëg ving yi rot, rëḵ mu mëm maḵ ahëm geving yi kesuu sa, in ngo hong hur rëḵ mëm tu arim ving. <sup>17</sup> Genelë sa nebë alu nehebë loḵ ti in Yesu yi huk, om gwelë Onesimus nabë sa, megwëko yi nöḵ vu hong.

<sup>18</sup> Lob nabë vong ngaa ti paya vu hong, ma su vo loḵ hong ngaa ti wirek rë, og ggovek, getum gwëbë sarëg doḵ nah in sebo doḵ. <sup>19</sup> Sengo kevu gägek sënë rak nemag niröp bë, sa Paulus sengo rëḵ bo

doḱ nah ngaa sënë nyëvewen vu hong. (Log sa su rëḱ nanër vu hong nabë sa nyëvewen ti neggëp vu hong in sën sa haḱo hong yom vu Anutu wirek lo rë.)

<sup>20</sup> Arig-e! Mehöböp yi mehö hong, om sa bë gw-evong ngaa nivesa vu sa. Nabë gweḱo Onesimus nöḱ vu hong los ahëm nivesa vu yi, og saga rëḱ gevong besa kwag vesa jaḱ gesa gevong Kerisi yi huk los ayog sepëp. <sup>21</sup> Log seraḱ ni besa kwag nevo bë rëḱ gwevong noh vu gageḱ sën sa kevu agi. Yönon, seraḱ ni ggovek ya bë rëḱ gwevong pangsën rot mekesuu ngaa sën senër vu hong gwëbeng agi.

<sup>22</sup> Log sa gageḱ ngwë nahën nebë: Gwero sa nyëḱ ayo ti begëp borot, in sa kwag nevo bë Anutu rëḱ gengo ham jomraḱsën, lob rëḱ bo sa vër besenök vu ham.

### *Gageḱ Ahë-nivesa-yi*

<sup>23</sup> Log Epapras sënë nedo ḱarabus ving sa rak sën nenër Kerisi Yesu yi gageḱ rangah lo. Kwa nevo hong ving benër bë ahë nivesa in hong.

<sup>24</sup> Log sir sën he nehevong Anutu yi huk loḱ ti lo, Markus, gAristarkus, geDemas, geLukas lo, kwaj nevo hong ving bedenener. <sup>25</sup> Hil Mehöböp Yesu Kerisi yi semusemu medo geving ham pin anomin.

**Gagek Mewis**  
**The New Testament in the Central/Mapos dialect of the**  
**Buang language of Papua New Guinea**  
**Nupela Testamen long tokples Buang Mapos long**  
**Niugini**

Copyright © 2003 The Bible Society of Papua New Guinea

Language: Buang, Central/Mapos (Buang)

Dialect: Central/Mapos

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

---

PDF generated using Haiola and XeLaTeX on 11 Nov 2022 from source files dated 9 Oct 2020

18a972db-abcc-5dc3-9031-f1d4455b33c3